

Jí² ti tún² 'e gasii¹ in San Pablo tíi² tsá² 'in néei¹ Tsalónica

Jí² gasii¹ in Poo²

1 1 Jna-a, Poo², coon¹³ Silvano coon¹³ Timoteo jmoo²¹ o'o 'e jí² lo 'e sii²¹ na'a tyii' 'in jo¹ líi² Cristo 'in seen²¹ fu Tsalónica. Jileei²¹ naa' 'in sicaain²¹ coon¹³ Dios Jmii²¹ joongi coon¹³ Ña'ñu¹ 'u' Jesucristo. **2** Dios cwouncwaa¹³ 'i naa' joon cwoseen²¹ naa' 'e tyú² coon¹³ 'ii²¹ tya' Dios Jmii²¹ coon¹³ tya' Ña'ñu¹ 'u' Jesucristo.

Dios ijmáa¹ o 'ii²¹ tya' jileei²¹ 'in røøi²¹ tsaa² mi jó¹ Cristo

3 Tsaru¹ u', ná¹ cwoo¹³ o'o 'maai¹³ Dios coon²¹ tøø² mo 'wii²¹² tyii' jiin¹³ joon tii²¹ moo'o tsu líi¹ ngalifee¹ 'e jai² líi² naa'. Joongi líi¹ gi un'iin²¹² naa' tsaruu²¹ naa' la jaain²¹ la jaan²¹ naa'. **4** Cwáain¹ la joon faa¹³ a'a 'yaai¹-tsii¹ 'i 'wii²¹² tyii' jee²¹² 'in jai² líi² Dios. Faa¹³ a'a xiiala jmaa² aa' taa²¹ 'e tsáai¹-oo' Jesús fiin¹³ moo² oo' wúu¹ 'áai¹ tya' tsagoo² oo' joon seen²¹ naa' fa'í³. **5** Jilaa²¹ 'e la lo-o jmoo¹-o júu³ 'e røø²¹ jmaa¹ a Dios 'ii²¹ tsu coon¹³ wúu¹ 'e moo² oo' cwáain¹ tya' tyu² Dios to² 'e tyá² Dios 'naa' tyú² ingii²¹² moo' fu ñu¹ fú².

6 Pe 'ii²¹ røø²¹ jmaa¹ a Dios mi 'e² e wúu¹ 'in niga'e² 'naa' wúu¹. **7** Joon jileei²¹ 'naa' 'in gangóo¹ wúu¹ 'ii²¹ 'woo²¹ o coon¹³ jna'a mi jó¹ jmii²¹² ijneei²¹ Ña'ñu¹ 'u' Jesús jó¹ fu ñu¹ fú². Ijó¹ coon¹³ ángeles tya'a 'in jmoo¹ o to² tyu² u'. Ijó¹ jee²¹² sii¹³ jí² jii¹ 'áai¹. **8** Ijó¹ i'e² e wúu¹ jileei²¹ 'in jo cwii¹ 'in Dios joongi jileei²¹ 'in jo nuu¹² un júu³ tya' 'e tiin¹³ tsá² tya' Ña'ñu¹ 'u' Jesús. **9** Jileei²¹ 'inlo inii²¹ wúu¹ coon²¹ tøø² mo. I'woo²¹ mo tyani Ña'ñu¹ 'u' joon wíin² i'lee¹² i 'ido 'ii. Jo jóø² gi jilaa²¹ 'e 'ya² gi 'ii²¹ tya' Dios. **10** Jo jóø² mi jó¹ Jesús jmii²¹² mi untyúí¹ tsá² tya'a 'ii joon mi un'goo²¹ jileei²¹ 'in jai² líi² 'ii. Do-o itaan²¹² naa' tsu 'wii¹³ nigalitsáa¹ mo-'oo' júu³ gacwoo²¹ o'o.

11 'Wii¹³ 'elo-o faa¹³ a'a júu³ tyú² 'wii²¹² tyii'. Mii²¹ i'i tyani Dios 'e untyúu¹ i Dios 'naa' tsu joon líi¹ naa' tsá² jiin¹³ la 'iin²¹² in. Faa¹³ oo'o jon júu³ tyú² tyani Dios tyi' 'e cwountiin¹³ mo coon¹³ 'ii²¹ tya'a jilaa²¹ tyú² 'e 'iin²¹² naa' jmaa² aa' coon¹³ la to² 'e jmoo² oo' 'e tsáa¹ mo-'oo'. **12** Coon¹³ la joon iun'goo²¹ o tsá² Ña'ñu¹ 'u' Jesucristo 'wii¹³ to² fee¹ nigajmaa¹ a coon¹³ juncwii²¹ tyii'. Joongi niun'goo²¹ o 'naa' 'wii¹³ Dios tyi' coon¹³ Ña'ñu¹ 'u' Jesucristo galifee¹ mo-tsi 'wii²¹² tyii'.

Tsá² 'in røøi²¹ tsaa²

2 1 La joon, tsaru¹ u', cwáain¹ tya' mi jó¹ Ña'ñu¹ 'u' Jesucristo jauncaain²¹ jna', 'e toon²¹² on' coon¹³ on, mii²¹ i'i tyani² ii' **2** jo unsíi² naa' 'e 'i¹-oo' 'e jo to² tyan¹. Joon jo cwofee²¹ naa' wa sá² coon²¹

júu³ 'e jin² 'e gacwá² najó¹ jmii²¹² tya' Ña'ñu¹u' xufiin¹³ jin² tsá² 'e júu³ do siin¹²in Espíritu Tyú² tya' Dios si júu³ 'e faa²¹a tsá² 'e coon²¹ ganuu²uun' 'ee. Jon'gi cwofee²¹naa' fiin¹³ cwá² coon²¹ jí² 'e jin² tsá² 'e siin²¹²na'a. **3** Jo cwoo²oo' 'in coon²¹ 'naa' too² jiin¹³ coon²¹ cwáain¹. Tsu jéei¹gi jmii²¹² joon itíui² tsá² Dios joongi ijnéi¹ tsá² røøi²¹ tsaa² 'in jo tiin¹³gi. **4** 'Inlo-o 'in unfee¹mo ña'a lagi Dios joon 'in 'aa¹ tya'a jilaa²¹ 'e un'goo²¹ tsá². Joongi 'in tsá² do itsacwaa¹ cagi tsi inuu cwo¹ tya' Dios. Tsacwaa¹ lawa Dios. Joongi ijmeei²¹ ña'o lawa Dios.

5 ¿Ti jo tii¹³-oo' 'e gafuu²¹²uu 'naa' jilaa²¹ 'elo mo gataan²¹²na jee²¹² 'naa'? **6** Joon ñi³oo' 'ee jni¹² tya'a 'e joon jo lí² cwéi¹ 'ido. Joon jo lí² jnee¹ ce gatí² 'ii²¹ tya'a. **7** Jilaa²¹ júu³ 'e gó² tya'a nijmoo¹o to² 'uui²¹ nano. Joon jiin¹³ 'e ná¹gi mi 'e cwéi¹ 'in gó² do 'e ityímo Dios 'in jni¹² 'in jmoo¹o 'e gó² no. **8-12** Mi yui¹³ la tyii¹i Dios 'in jni¹² do lawa'a ijné¹mo 'in tsá² gó² do. Ijmáa¹a li² áai² joongi milagro 'láai² pe jmai² júu³ tajuu²¹. Ni'noo²¹on jilaa²¹ 'e gó² icoon²¹on too² jileei²¹ 'in jo tiin¹³gi. Tsu jo gali'in²¹²in 'in tsá² do nuu¹un júu³ tyú² wa'a 'e tiin¹²in. 'Wii¹³ joon jmaa¹a Dios 'e 'ii²¹ 'in tsá² do júu³ gó² 'e lí² tsáai¹-tsi jilaa²¹ júu³ tajuu²¹. Joon tsaliin¹mo li jo tiin¹³gi tsu jo galitsáai¹-tsi júu³ tyú². Joon gatí²gi-tsi jilaa²¹ 'e gó². Pe joon Ña'ñu¹u' Jesús iingaa¹²mo 'in gó² do coon¹³ tyí² 'woo²¹ 'oo²o. Joongi iduui¹ coon¹³ 'e jná² joo²¹ tya'a mi jó¹.

Gatyii¹³mo Dios 'naa' 'e tiin¹³moo'

13 Pe jna'a tii²¹moo'o cwoo¹³o'o 'maai¹³ Dios 'wii²¹² tyii' tsaru¹u' 'in 'iin²¹²in Ña'ñu¹u' tsu Dios nigatyii¹³in 'naa' ca la mo 'wiin²¹² 'e tiin¹³moo'. Joon gajmaa¹o tiin¹³naa' coon¹³ Espíritu Tyú² tya'a 'in nigauntyúi¹ 'naa' joongi coon¹³ júu³ tyú² 'e nigalitsáai¹-oo'. **14** Gatø¹ø Dios 'naa' 'e ilí²naa' tsá² tya'a. Coon¹³ júu³ 'e xiiala tiin¹³ tsá² 'e gacwoo¹³o'o 'naa' gatø¹ø Dios 'naa' 'e i'ii¹³xuu' 'e tyú² 'e cwoo¹o Dios Jmii²¹ Ña'ñu¹u' Jesucristo.

15 La joon 'naa', tsaru¹u', taa²¹ jmaa²aa' jo cwo'íin²-oo' jilaa²¹ cwáain¹ 'e nigacwoo¹³o'o la mo gatoon²¹²o'on coon¹³ 'naa' joongi mo gasiin²¹na'a jí². **16-17** Joon mí³ii tyani Ña'ñu¹u' Jesucristo joongi tyani Dios Jmii²¹ 'e cwo¹o 'naa' pí² 'e jmaa²aa' jilaa²¹ 'e tyú². Tsu 'wo²-tsi Dios nigali'in²¹²mo jna'. Joon gacwo¹o jna' 'e seen²¹na' tyú²-u coon²¹ tøø²mo. Joon gajma²a jna' júu³ 'e jmáa¹ 'e tiin¹³naa' 'wii²¹² feei¹-tsio.

Faa¹³aa' júu³ tyú² 'wii²¹² tyii'i

3 **1** Coon²¹gi júu³ fuu²¹² 'naa', tsaru¹u', faa¹³aa' júu³ tyú² 'wii²¹² tyii'i 'e la jmoono ityí¹a júu³ tya' Ña'ñu¹u' la caain²¹. Joon i'ii²¹mo tsá² 'e júu³ do 'yaai¹-tsi la galí² jee²¹² 'naa'. **2** Faa¹³aa' jon júu³ tyú² 'e cwoláa²mo Dios jna'a jee²¹² tsá² 'lii¹³ joongi soo²¹-tsi tsu jo jileei²¹ tsá² tsáai¹-tsi Jesús. **3** Pe untiin¹³mo Ña'ñu¹u' júu³ tya'a. Joon 'ii

icwo¹o 'naa' pí² joon un'øø¹³mo 'naa' jilaa²¹ 'e gó². **4** Joon tsáa¹mo-tsii'i 'e Ña'ñu¹u' iuncoon¹³on 'naa' 'a jmoo²oo' joongi ijmaa²aa' jilaa²¹ to² 'e tyuu¹³u' 'naa'. **5** Cwouncoon¹³on Ña'ñu¹u' 'naa' 'e 'øø²¹mogi-'oo' xiiala 'iin²¹²in Dios Jmii²¹ 'naa' joongi xiiala gajmaa¹a Cristo taa²¹a 'wii²¹² tyii'.

'Ná¹ jmaa¹a tsá² to²

6 Tsaru¹u', tyuu¹³u' 'naa' to² coon¹³ 'e sii²¹ Ña'ñu¹u' Jesucristo coon²¹ jmaa¹aa' yaanaa' jileei²¹ tsaru¹u' 'in jo 'iin²¹²in jmá¹ to² joongi 'in jo jmoo¹o nuu¹³ júu³ 'e nigacwoo²¹o'o. **7** Tsu niñi³ 'naa' xiiala cwooi¹ taain²¹² tsá² 'e jmáa¹a la jmó² jna'a. Jo saan²¹na'a jee²¹² 'naa' wa'a jo jmoo²¹o'o to². **8** Jo gatyee²e'e 'uunni² tya' jiin¹³ jaain²¹ wa'a jo gatyii²¹i'i 'laa¹³. Tsu jmoo²¹o'o to² 'woo¹ jmi¹ la coon²¹ jiin¹³ jaain²¹ jo 'iin cwotyapai¹ jee²¹² 'naa'. **9** Fiin¹³ 'oo²o'o 'ii²¹ 'e mii²¹i'i 'naa' jo gamii²¹i'i 'naa'. Gajmoo²¹o'o to² 'e 'ee¹³e'e 'naa' xiiala 'ná¹ jmaa²aa'. **10** Tsu mo gatoon²¹²o'on jee²¹² 'naa' joon gacwoo²¹o'o 'e 'ii²¹ lo: "Jileei²¹ 'in jo 'iin²¹²in jmaa¹a to² joon jo dø¹ø." **11** Tsu nee²e'e júu³ 'e 'inlíi¹³ jee²¹² 'naa' seein²¹ jo 'ee to² jmoo¹o. Jøø²mo taain²¹² ngii¹i to² jmoo¹o 'atsaa²¹. **12** Tya' tsá² 'in líi¹ la joon tyuu¹³u' to² tyaa²¹a'a cwoo²¹ coon¹³ 'ii²¹ tya' Ña'ñu¹u' Jesucristo 'e cwojmaa¹o to² joon dø¹ø jilaa²¹ 'e jnaa²¹a.

13 Tsaru¹u', jo cwo'woo²oo' 'e jmaa²aa' 'e tyú². **14** Wana 'iin 'in jo jmoo¹o nuu¹³ jilaa²¹ 'e faa¹³a'a coon¹³ 'e jí² lo cón²duu' cwáain¹ 'iin 'i joon jo 'ee cwoliseen²¹naa' coon¹³on la coon²¹ 'e 'aa¹a fa'ii²¹. **15** Joon jo cwoli'ee¹naa' pe cwoo²oo' cwáain¹ lawa jaain²¹ ruu²¹moo'.

Júu³ tyú² li gatséi¹

16 Joon 'in Ña'ñu¹u' 'ña'a, 'in jmoo¹o 'e seein²¹ tsá² 'e tyú², cwocwo¹o 'naa' 'e si'ii¹³-oo' 'e tyú²-u coon²¹ tøø²mo la joon jon coon¹³ jilaa²¹ itsangii²naa'. Joon cwotaan¹in Ña'ñu¹u' jee²¹² 'naa'.

17 Jna-a, Poo² jmóo³oo 'e júu³ lo coon¹³ cwóo³oo. Fo³oo 'aa²¹²moo'. La joon tíi²na jmóo³oo jilaa²¹ jí² 'e jmóo³oo. **18** Ña'ñu¹u' Jesucristo cwouncwaa¹³mo 'naa' jileei²¹ 'naa'. Amén.